

則雖極端反對黨。亦衆口一辭。

張氏辭世前之八年。於實際上。已與政治競爭無關。以英人嗜政治若性命。其境遇蓋極爲悲慘。初、張氏猝患篤疾。聲浪低微。不能登壇演說。卽行動亦大不便。嗣後病稍間。腦筋靈敏如常時。而身體仍委頓。卒致不起。斯時政界風雲。環生迭起。設張氏康健如恆者。必爲此中之健將。今則垂老英雄。偃臥牀蓐。惟兩方激戰之聲。時聞於耳鼓。是則其境遇之難堪。

抑可知矣。惟夫人愛夫至篤。扶持抑搔。不離形影。而其哲嗣才華英挺。亦於政界中所有樹立。稍足爲暮年之慰藉耳。

張氏家屬。將於一二日內。舉行葬禮。此蓋世之英雄。從此乃與世長辭矣。然其生平行事。爲世人所稱道。與其嘉言懿行。貽後人之坊表者。固將歷千百年而不衰。卽其改革之能力。與其爲帝國之命運而求達之目的。亦足使人聞風興起。歷久而勿衰焉。

容觀槐(容閔之子)在華遭際之自述

譯美國世界雜誌

甘作霖

下篇

予主政於廣東製造局者。先後凡八閱月。平日與粵人往還。而因以訂莫逆交者頗多。粵人之知識及其進取之心。以予度之。似遠在北人之上。南之與北。實不啻別爲一種族也。予在局辦事。有通譯員三人。並承政府錫以中國陸軍中之少將銜。此外有兵五百人。小汽船二艘。亦歸予節制。自予總理局務以來。所有來福鎗機關砲以及子彈之屬。出產額較舊時幾增一倍。而成本則大減。貨品亦遠勝於前。然予固不敢以此自矜。蓋歐美人士之具有兵工教育。而精於軍械廠事務者。設遭際如予。則其成績必不在予下。當道者信任既深。事權斯一。由是而實行

振頓。初非難事。況乎粵省之工人。其技能尤堪稱美。設畀以機會。俾得在世界製造品之市場一相角逐。則外人之所以視中國工界者。其意見必將幡然一變於疇昔。獨惜粵人之工藝。非特未得與各國相競爭。且亦未嘗一顯於內國耳。予所以爲粵製造局改良者。其大致如下。

- (一) 採辦制之改革。以後採辦材料。悉以招人投標法爲基礎。
- (二) 實行歐美最新之成本制。
- (三) 器械磨厲部之分立。
- (四) 創立適宜之稽查部。
- (五) 減輕成本。增多出品。同時並做行美國工廠之花紅制。
- (六) 揭示規約。繕布章程。

26833

(七)減輕來福鎗之分量。

(八)改換機關砲之砲架。使分量較輕。鵠的較準。而砲彈所及之高度。亦視前爲有加。

(九)銷售廢舊之出品。卽以此項入款添購彈筒製造機。

(十)以硝石重調霉壞之黑藥。此項火藥賴是保存者。足供五年之用。

(十一)來福槍應用各機件。其屯積法均採最新之制度。

(十二)振頓工藝房。使工人悉遵新定之紀律。一掃從前積弊。

予既奉職於廣州。因得與各界人士相晉接。而中國之社會情形。亦得以窺知一二。華人家族觀念。視父系恆較母系爲重。予父中而母西。故粵人多引予爲同類。而交際之間。以是遂便利不少。是時予接蔡廷幹氏北京來書。揭載於此。以見蔡之觀念。固與一般華人無異也。蔡書曰。

容君足下。四月九日蒙惠書。感謝無似。知君指揮如意。

與粵人又相得。倍益快慰。粵爲君之故鄉。與君家有戚族之誼者甚多。君之愛粵人。自與愛他省之人不同。此亦情理之至當也。君自奉職以來。對於局務。一意改良。措施之間。自不能人人而悅之。以此結怨於人。固所不免。人有恆言。石可爲燧。擊必有火。擊而無火。便非真燧。此以喻剛強果敢之性也。君但求局務之進步可矣。至於彼尸位素餐。視製造局爲其寄生之窟穴者。君固可以勿問其喜怒也。某甚望胡都督漢民能如君之請。許貴局製造自動機手槍。以供軍隊之用。

用。某於製造軍械事宜。夙所關心。甚願中國於此類軍械。能自行供給。而無俟取資於外國也。近聞中俄蒙事談判。已漸有進步。征蒙之舉。固大可以從免矣。君之從弟名容海字馨九者。近狀何似。某與馨九爲老友。顧迄未與一通音問。惶惶惶愧。前接香港魏益君來書。與馨九事有關。乞轉告馨九。此間如有適宜之機會。某自當竭力也。如晤李濟東君及鹽運使署關鄉銘(以上人名均係譯音)博士。並希爲我道相念。風便幸時賜教言。蔡廷幹拜手。千九百十三年五月九日自北京總統府發。

予在粵時。某日適逢節假。得二日之閒散。乃攀登澳門背後之山嶺。而往訪前國務總理唐紹儀於家。同行者爲予從弟及中國少年五人。皆美國大學校之畢業生也。第一夜。宿於同行者某君之家。家在一小村。而某君擁資甚富。居宅甚廣。悉作洋式。凡歐美居家者享用之具。宅中無不畢備。惟其地盜風甚熾。故村之四周。繞以厚垣。並自設有電燈廠。防盜之具。則有測遠燈與麥格沁砲。並自僱衛隊十二人。皆身衣制服。頗饒糾桓之象。次日。乘肩輿。有扈從擁簇而行。跋涉山道。既抵唐君之家。則由主人饗以中膳。餚饌爲華式。而味殊精美。與向所謂黑蛋海草之屬。固不可以同日語。旋即興辭。陸行甚久。始抵澳門。幸開往廣州之夜班輪船。正鼓輪待發。乃急乘之而回。予是時初未知廣州政府或其當道諸人正在密謀二次革命。以與袁世凱氏相抗。然及今思之。則都督府中人不惜以大權相畀。

俾予得盡力於製造軍械事宜。而彼咬文嚼字。寬袍長爪。視此爲致富捷徑之中國局員。則反退處於予下。而莫可如何。其中固不無深意也。二次革命之起。異常兀突。廣州政府猝然宣告獨立。予乃辭退職務。悄然向北京進發。以局事報告於中央。時則陳炯明已起而代胡漢民爲都督。陳立遣緹騎。捕予之書記某。蓋恐書記在粵。予在北京。兩方面或有不利用於討袁軍之通信也。予北上時。道出上海。正值討袁軍開始進攻上海製造局。予勾留五日。投止於惠中旅館。當晝而睡。及晚則起。蓋每當夕陽西下。砲聲輒作。非第不能成寐。且亦欲乘此一覘其交綏之狀也。予以服務於北京政府之故。得乘小汽船赴製造局游覽。並登浦江所泊各軍艦考察一過。某日之夜。予偕英美煙公司中三數少年。赴戰地觀覽。警視討袁軍整隊而至。迫攻製造局。官軍砲火連發。其勢至烈。予輩急伏於暗陬。稍資掩護。即討袁軍亦與予輩同伏暗陬。然此等掩護之具。本極薄弱。而官軍方面之鋼皮砲彈。自頭上飛駛而至。其聲策策。直至清晨三小時。兩軍始休戰。予等幸免於難。而討袁軍之同伏暗陬。思乘機突出。越馬路而奔逸者。則往往爲砲彈所中。非傷即死。予冒險觀戰之次晚。即在惠中旅館之屋頂花園內。坐而遙矚。不復外出。該旅館在租界之內。與戰地相去較遠。固不至有意外。然南市砲聲隆隆。火光奕奕。一時耳而目之者。殊不能不駭然變色。時則旅館中有寓客某。狀貌威武。言詞亢爽。常衆人之前。發其簡短之演說曰。此區區製造局。竟值得費如許氣力。若使

敵國人當此。一百夫長已足破之矣。衆聞言。方肅然起敬。忽有一開花彈自空飛至。逼近於予等之耳畔。旋即跌入於沿浦灘之公園內。轟然炸裂。既而開花彈之飛至者。續續如貫珠。衆大駭。爭向升降梯而奔。冀下樓暫避。而其率衆當先。奔馳最迅者。即彼大言炎炎之某寓客。自誇其所謂敵國人者之武勇者也。嗣是一星期後。予抵北京。即繕具報告書。詳陳廣州製造局之情形。並將廣東現有之軍火。足資討袁軍之應用者。開單具報。由蔡廷幹氏爲予代呈於總統。閱數日後。總統府向予道謝。並留予暫住北京。是時北京宣布軍律。戒備絕嚴。祕密偵探。所在而是。此項密探。爲數凡一萬五千人。統歸戒嚴總司令部節制。於是而造謠生事。傾陷誣告之風大熾。善良無辜之民。以此被逮下獄。法廷不加訊。親友不及知。而陷於大辟之刑者。蓋不可以數計。此等制度。不過供奸人之利用。俾借此要索賄賂。攘奪財物。報復私怨而已。自南方二次革命既失敗。而各省皆盛行此制。被其害者。固不僅北京一隅之民。然細按其所誅夷而宰割者。其中頗不乏忠於袁氏之人。而受禍最酷者。尤在於學成回國之留學生云。予抵京後。在西海岱門街。賃一中國式之小居宅。與使館所在之交民巷。相距約一英里。予無眷屬。亦無同居之友。惟華僕及苦力各一人而已。某日之夜。約十一點鐘。予乘人力車自外而歸。甫下車登階。叩門以待僕役之接應。警視屋之暗隅。有一人直立。旋即疾馳而前。力捉予之左臂。予疑爲悍賊。突出右拳擊其額。首仰而頂蓋觸於瓦垣。

26836

遂蹶然倒地。是時忽有憧憧黑影。環繞予之四周。而予之左右臂。均被若輩所握。予憶當時會奮起一足。踢予前面之人。其人被踢。亦即傾仆。然若輩忽自後擊予首。予遂昏暈。及醒。則兩手已被反縛。一人執手槍。擬予額。又有人曳予而行。蓋予是時猶坐地未起也。予之僕人劉姓。啓門而出。亦被若輩所縛。惟苦力則未爲所見。故得幸免。予被縛之後。始恍然於此身已入惡探之手。自念九死一生。呼援無術。不覺心骨爲之驟冷。計其人數。約十有六。至其狀貌之猙獰。尤爲予有生以來所僅見。十六人中有押予而行者。亦有入居宅搜檢者。實則所謂搜檢者。不過搶劫之代名辭而已。時則道途黑越。若輩牽予而行。試叩以逮捕之緣由。或請通告於美使署。若輩非惟不答。且力抽予兩手所縛之繩。每一抽動。輒覺痛徹心腑。既而入紫禁城。復前進不已。行愈進則去公使館自愈遠。而予之生機亦愈促。及予力盡筋疲。不復能步履。若輩乃奮力拖曳。而擲予於西城之大軍獄。此軍獄者。夙負可怖之惡名。謂無論何人。苟一入其中。卽無生還之望也。予入獄後。卽由獄卒加以足鐐。典獄者爲一老而胖之華官。貌雖兇惡。然闊茸之氣。自不能掩。予乃思有以惕之。是時予於京語。已頗知一二。遂告以予爲美國人。若輩幽予於此。將來美公使出而交涉時。其責任固全在獄官之身。有典守之責者。幸好自爲之。予不過漫爲此言。以相恫嚇。其實予被捕之舉。至爲祕密。固無由入於美公使之耳也。然而彼老而胖之無賴華官。一聞予言。果微微變色。時則

予居宅內之革囊一具。文件若干。自動機手槍二柄。連同最初下手之偵探。卽被予一拳擊傷其額而踣地者。均由偵探等攜之而入。若輩見予。卽連稱此獠殊兇狠。予稔知華人性質。與美國人極端相反。乃益故爲大言曰。爾曹服式如強盜。面貌又猙獰。予固萬不料其爲官府中人。幸予當時未挈有手槍。不然乃公一揮手。爾曹將無噍類。豈第薄受拳傷而已哉。予此時若被捕於白種人之雞鳴狗盜者流。則斯言一出。性命或且不保。然而中國之祕密偵探。則反斂其揶揄之容。而敬禮有加。斯亦中西人絕不相侔之處也。未幾。有身衣制服之馬兵一排。入獄監守。而彼老而胖之獄官。則偕其副官某。詳檢予之文件。並審問僕人劉某。華官談話。予雖不能盡解。然予之被捕。大約係奉上臺之命。且須立正典刑。不復經法庭審訊之手續。惟遍閱文件。絕無破綻可尋。且其中有陸軍部所發軍火執照及美政府護照各一紙。護照係英國文字。華官莫名其妙。予乃釋明其性質及功用。並稱袁總統與予相識。蔡廷幹爲予良友。美公使又爲予本國之外交代表。汝曹若貿貿然於明日之晨。置予於死地。則起而爲予伸雪者。必大有人在。明知汝曹不過奉命而行。生殺非由己意。然一旦相煎既急。仍不能不以汝曹爲犧牲。而戮之以謝予於地下耳。予侃侃而談。頗中肯綮。彼老醜之華官。意殊不能無動。乃另啓一獄室。命予與劉僕同處於內。守以兵士七人。而足鐐則立行撤去。然予自知命在呼吸。憂懼不能自已。一則予被捕之舉。無由傳達於予友。卽或通信有人。而時

機已促。營救亦恐不及。一則此輩惡偵探結隊掩捕。曾無忌憚。又敢於既捕之後。橫肆摧殘。則其毫無反顧之心。而必欲置予於死地可知。一則此事主動。出於上峯。固無疑義。然所謂上峯者。其地位果居何等乎。得毋欲甘心於予者。即彼巍巍元首之袁世凱氏乎。予偃臥於獄室中之囚上。輾轉終宵。不能成寐。既而天已黎明。予與劉僕。惟有延頸待戮。及鐘鳴五下。而行刑之軍隊不來。每歷一分鐘。在予等不啻若一小時。未幾。有守兵若干人。入獄監視。較夜間尤嚴。而夜來之兵十七人。則以已得替代。即行撤退。浸假而清晨已過。時方亭午。予之厄運。即於此時轉移。而予固未之知也。蓋予於夜間被逮時。苦力某見勢不佳。即由側門而出。奔赴捷成洋行報告。該洋行即受我紐約李洛克林公司之託。而為之代理人者也。捷成之駐行工程師德人某君。旅華有年。於中國時局素所稔悉。故一聞苦力之言。即已洞窺此事之真際。於破曉時。奔告蔡廷幹氏。請其

速探容某之下落。及蔡氏急起調查。則步步障礙。處處阻隔。是益足見予之被捕。實由大有力者發蹤指示。而隱操其機括也。據蔡氏事後告予。謂既已無法可施。不得不徑陳於總統。而予始得於下午五點鐘被赦出獄焉。予所以入獄後。猶得苟延殘喘。以待蔡氏之營救者。則以予狀貌不類華人。一也。被搜之文件中。並無犯法之據。二也。以言隱諷獄官。俾不至於事後代上臺受過。三也。凡此三者。皆足以動獄官之猶豫。而暫緩其執行槍斃之命令者也。然關鍵之尤重要者。則在獄官之晏起。中國官場。習氣最多。而晨間不能早起。亦其一端。晨鐘五下。而彈丸未被於予體者。以獄官曉眠正熟故也。迨其遽然夢醒。則電話機正鏗鏘有聲。而蔡廷幹之詰責至矣。是則華官晏起之習。其有造於予者。詎非甚大哉。然予自遭此厄。即匆匆返國。歸途由星嘉坡印度洋蘇彝士河而西。此不得謂非環游世界一周。而亦藉此以稍舒胸臆。而澆其塊壘也。

國有鐵路之利弊

加拿大太平洋鐵路公司總理沙納西氏 Sir Thomas Shaughnessy 原著

錢智修

頃者外觀報 The Outlook 代表。詢余對於鐵路國有之意見。余實未敢遽答。余外國人也。雖曾參預美國鐵路。今固處旁觀之地位矣。而關於此等問題。則旁觀人之意見。每無何等價值。以外國人而議人家國事。一若借箸代籌。言必有中者。可為謬

妄已極。蓋彼等之觀察。縱極詳慎。其見解終與本國人不同也。彼等雖可借本國人之眼光。觀察事實。終缺乏國民的感情。此國民的感情。常潛伏於隱微之處。而為造成輿論之要素。外國人又安能有同情之感耶。十年以前。外國人預料美國進步之趨